


Green Energy Symposium cu enfoka riba produccion di cuminda



ORANJESTAD — E di tres edicion di Green Energy Symposium ta enfoca un biaha mas den conscientisa hobennan riba ta sostenibel. Topico di aña aki tabata produccion di propio cuminda via agricultura. Den siman aki muchanan di varios scol ta bayendo Cas di Cultura pa tende charlanan informativo riba esaki.

Antayera nochi, e Green Energy Symposium a wordo teni pa tur esunnan cu ta interesa pa sa mas riba un bida sostenibel y con pa produci bo propio cuminda. Obviamente esaki ta un publico hopi otro cu e muchanan pa cual e simposio ta wordo organisa, pero e entusiasmo no tabata menos. For di organisadonan den Bureau Innovatie cu ta responsabel pe evento, Bon Dia Aruba a compronde tambe cu e acogida cerca e muchanan ta hopi bon y cu nan ta keda hopi entusiasma riba e topiconan cu ta wordo treci dilanti. Mester bisa tambe cu tur esunnan cu a haci nan presentacion a haci un bon empeño pa haci nan contribucion uno hopi accesibel y interesante, sea pa grandi of chikito y di tur nivel escolar.

Nathalie Maduro, director di Centro di Agricultura, Cria y Pesca Santa Rosa, a splica riba e meta cu gobierno tin pa yega na un situacion na aña 2020 na unda no menos cu 20 por ciento di cuminda na Aruba ta bin for di riba nos isla mes. Pa yega na e meta aki no mester di tin tereno enorme pa lanta cunucu, Maduro a splica. Tur hende por cultiva fruta y berdura den nan mesun cas uzando metodonan manera aquaponics y raised beds.

Awa

Marc Croes di WEB di su banda a splica riba importancia di recicla awa, por ehempel dor di captura awa di

airco. Tambe tin awa di pos, di regenbak y di dam cu cual por cultiva riba escala chikito. Croes a splica cu tin tres tipo di awa na un cas, awa potabel cu ta bin di WEB, awa shinishi y awa preto. Awa shinishi ta e awa cu ta sali for di labamano, baño y wasmashin. Awa preto ta e awa cu a sali for di bo w.c. y for di bo cushina. Awa shinishi por wordo filtra y uza ainda pa flush w.c., laba paña y duna mata. Awa preto ta dreña riool y ta bay ta wordo haci limpi pa bay bek lama. Croes ta bisa cu lo por bolbe uza e awa ey pa duna mata despues cu el a wordo haci limpi. Hopi impacto e presentacion di Johannes Lankester a causa na unda el a splica con comunidatnan chikito por lanta nan mesun plantacion den un forma di cooperativa y produci hopi mas hunto cu nan so of cu ayudo di gobierno. Lankester a boga pa menos fase entre productor y consumidor. El a muestra tambe maneranan futuristico di produci fruta y berdura den ciudadnan y otro luganan na unda lo no spera di biaha cu ta wordo planta.

Coriente y pisca

Elton Lampe di Elmar a muestra den su presentacion riba posibilidad den cual electricidad por asisti agricultura, por ehempel dor di produci awa cu turbinanan di biento cu ya t'ey caba pa produci coriente. Si ta posibel pa saca awa for di aire cu tecnologia moderno den un situacion extremo manera un desierto, e ora mester por ta posibel pa haci algo similar den un situacion menos extremo manera Aruba, asina Lampe a argumenta.

Taino Heinze ta un empresario hoben cu tin e meta pa traha su mesun cria di pisca na Aruba. Den su presentacion el a muestra riba necesidad di esaki, mirando cu den nos awanan tambe pisca ta birando scars. No tin mucho

datonan, pero piscadonan sa cu antes tabatin hopi mas pa saca for di lama. E mesun piscado cu antes tabata saca 200 kilo pa dia pa asina distribui na restaurantnan local tin suerte awa si e saca 50 kilo.

Carbon footprint

Patty Portier di Ibis a splica den un presentacion extenso riba necesidad pa cuida nos dieta y come saludabel. Come bon ta resulta den miho trabou y - den caso di muchanan di scol - miho estudio. Finalmente profesor Fred Stoss di Universidad di Buffalo a duna un presentacion riba carbon footprint y influencia di esaki tambe den produccion di cuminda. Stoss a splica cu tin diferente manera di innova den paketa y transporta cuminda pa por yega na un carbon footprint mas chikito. Mas CO2 ta dreña den atmosfera, mas



esaki ta influencia clima y asina tambe produccion di cuminda. E plan ta pa produci mas, cu menos desperdicio. Si Aruba yega na 20 por ciento di produccion di tur cuminda pa e isla, esaki lo por yega na un ganashi di 8 milyon dollar. Placa cu por

wordo uza pa haci e produccion mas grandi ainda. "E ta miho cu gana loteria", asina Stoss ta indica. Aruba ta un experimento unico, den cual conscientemente ta busca manera pa baha consumo di energia. "Boso ta bay ta hopi druk den añanan cu ta bin."